


KEI TIA MLUNG HOA NI

Ngvah ei puum sha
Thing hnah-a kba
Mhnüüpat kho üng
Akyü be ta
Kei tia mlung
Hoa ni

Kei tia mlung
Lunga mäia
Ngsang kyo lüphi
Mei khoh kpoma
Ak'uma ni
Ave kom

Hlün hlah hlün ktung
Khyun kyo lüphi
Sumtu khi noh
Ajoon in ta
Samsah hoa
Lai kkhai ni.

Booisa ngya kyah
Nghngi siim abäng
Msüm hnün kseena
Nih khüt päih lü
Mput kkhuia ngjäm vai
Kei ti naak ta
Hoa lai



KAH IH NGMANG VA NIKHÜNG VAI

Kah sa...
Lobe kti lü
Ning dou naak vai
Kini nah mjung
Am vek kba.

Kah sa....
Phalok kti lü
Nah don naak vai
Ngja mkap nah mtan
Am vek kba.

Kah sa....
Lai lok kti lü
Nah nah üm kyo
Ngxü hnuuna yüüi
Am ve kba.

Kah sa....
Säh lok kti lü
Nah yaih kyo kti
Nah müi-hmaai ta
Am vek kba.

Kah sa....
Theih lok kti lü
Nah nah uut kyo
Ng'uui kti nah ngbeeng
Am vek kba.

Kah sa....
Nih veyüm lü
Ngthiim jah ngmüi ta
Yaai hleeia mäi
Vehnüh khü.



Kkhyou jah mpa phi
Jah leh mhlai lü
Ong-saang kunpan
Poh mshah ei üng
Nih kyaxo lü
Shumpak khoi.

Khüüi khoh kti noh
Mpyu dung shung kkhai
Mleeng kye tak lü
Ah ve üng phi
Ngkei ngku hnaih ei
Veham kti.

Shongnu ia
ü ü lolü
Daaina ia
E e lüphi
Hnün shing ngoh lü
Vekyet bä.



TUH NGOOI KONA KHO NGOOI

Je naak kkhyäi paai
Athuum üng ta
Mboih kyah lam phi
Nih mhläi to kkhai

Mlū naak hlū ei
Ase üng ta
Mhlim eie phi
Ongtui mkhyuunga
Thoon to kkhai.

Lūphi kah pūi
Hin kba tilū
Nih nu msuh tui
Nih tu veeng


Mhüüpat kho sän
Mū kyo lūphi
Mthanat yama
Athaih üng ta
Ngooi kho ksheena
Thoon be kti.



ASÄNA MÄI NAH HMUKHOIO

Kah püi hin kba
Nah shoong khoio
Ning kphya naveeng
Ti in ma lü
Akse kkhyaang mat
Hei kphya nalü
Ngpyot hü hü kti
Nah hmukhoio

Kah nih pät däk
Nghmuh lo üng ta
Nang ni kah shuun
Kah jiin thing ni
Tima ma lü
Kkhyü-shing be-taam
Pyen kyo lüphi
Ashüt üng ta
Kkhyaaak akse üng
Vakaai kti ta
Nah hmukhoio



Shongtu mpa tim
 Yuk yäai ning noh
 Nih nu kkun säp
 Jah kshü hnüh lü
 Mtupi mkhuuinu
 Kho suui yoh soong
 Ääikhi kbah lü
 Kyah yün shoa
 Kyong da seh üng
 Kho müa ta ah navek kkhai
 Paai long ima
 Titi ngüshe.

Ho.....asan üng va
 Ngshe book ngsum lü
 Phalo be kti, nih paai long u
 Jekyai xe xok
 Nih dou vaai vai
 Häh.....häh tuh ngooi
 Näai Longa mjung tui
 Paai Long mah mah
 Buh kpäi mat üng
 Leng suum päih lü
 Ei ook yüm vai
 Tuh ta jekyai be hnüh u.



PAAI LONGA PHA LO BE VEI

Kah paai long, ning hmaaü ei lü
Mü tä täsham, kah nih ih u
Hjou lo hnüh ve, a i ni
Mthan nu kdinga
Kshoh kkhok kthai hngoh
Ngjaak lo vai mä
Ih mik mphaai lü
Ning hei büh phi
Kah paai longo nah pha lo vai
Ning mtäh shoa
Mhnüüp jah mthan phi
käh yü thei ong
Shuui kho nüt lü ning yün ni.

Mpyuk sho khya üng
Loua sit kti, kah nääi long phi
Kho mü lolü
Buh ei vai tä, mtäh ei lä kyo
Jah khyoot ei lü
Ngkou nghleei shoa
Ih be tüa thoon kti ni
Paai Long i tüh
Phalo be kkhai
Mla yam bäk lü ning yün ni.



NGLOOI PÜI TI TA...

Doa mhnüüp üng
 Jah do püi kti
 Nih phäh nglooi püi, ksang am niham
 Mseei ei yeet bä, kah püi ääi
 Sheeta mhnüüp üng
 Jah Sheet püi kti
 Nih nglooi püi kdo
 Käh khyah vai.

Jekyaia mhnüüp üng
 Je püi kti sän
 Nglooi püi aksang i am niham.
 Mseei ei yeet bä kah püio
 Kyah-a mhnüüp üng
 Kyah püi kti sän
 Nih nglooi püi kdo
 Käh khyah vai

Mülüm ju k'o, anaküt phi
 Pasong kdo päih i am ni u
 Shuui limma noh phi, ok kti ni
 Thaih peeng buh k'ei, anaküt phi
 Ngla mi ksheen päih, am ni u
 Pyat shikya noh phi, ei kti ni.




KSÜÜN SHAK MALAM...

Ngthu nghlai thei kti
Phun kam jou sheet
Kho mdek nua mkhuh hmlih
Akdo akshe, käh kshing hmat lü
Kunnu kkepa, nghngi siim sa-a
Thoon loa kkhyüh
Malama phäh kho tuh vei säp
Seh soon yah ni.

Seh soon mkhyah mtaan
Hin khomdek nu
Kah don soon naak
Malama phäh ni ti ti ngüshe
Kah nüüm yaan naak
Kah malam kdo
Khyük leih lüphi
Shui hjam piit pyaang be yah ni.

Mlunga ngkou kthai
Ua kshing püi
Kho pyook shuuna
Kah ngjaak lo kya
Kah ih ngmanga nah mhju peet lü
Akvaai kah phäh, nah pelok kti
Mah khya loon ta ning je ei
Kah nua phun kam, ääp ei lä lü
Malam kah mtääm, ei lä kkhai.



KAH SA NAH NAH KTHÄH TO TA

Shi nu thinga ngdüih naak ni
 Nu msuong hin hmüün hmüün i am ni
 Nih nu hin hmüün hmüün i am ni
 Mpyu kseng hin hmüün hmüün i am ni
 Kah sa, hmüün hmüün i am ni.

Sha yang mkha-a ngtaih naak ni
 Pa kseng hin hmüün hmüün i am ni
 Nih pa hin hmüün hmüün i am ni
 Thaai baang hin hmüün hmüün i am ni
 Kah sa, hmüün hmüün i am ni.

Mpyoong mah ksima ngbah naak ni
 Nih nu hin hmüün hmüün i am ni
 Nu msuong hin hmüün hmüün i am ni
 Mpyu kseng hin hmüün hmüün i am ni
 Kah sa hmüün hmüün i am ni.


Shohlai lia ngtun naak ni
 Nih pa hin hmüün hmüün i am ni
 Pa kseng hin hmüün hmüün i am ni
 Thaai baang hin hmüün hmüün i am ni
 Kah sa hmüün hmüün i am ni.

Ngbuung longa she ksiina loon naak ni
 Khaaü longa vok laia ngseh naak ni
 Nih nu hin hmüün hmüün i am ni
 Mpyu kseng hin Hmüün hmüün i am ni.

Mshong thääi tuia li naak ni
 Ngsak ngthang haanga loon naak ni
 Nih pa hmüün hmüün i am ni
 Thaai baang hin hmüün hmüün i am ni.

Yang sumo hmüün hmüün i am ni.

Nah paai long
 Yang Long



Tui sik ngsiima shiip sā
Kpuung nu ni tuia shiip sā
Mpyu kseng ni kkoa phu kti
Msuung tui ni kkoa phu kti
Nu tui i am kääi laang ääi
Ngleen pa i am kääi laang ääi
Thaai baang ni ksenga the sā
Nghleeng long ni xa-a ngshooi kti
Nghleeng long ni meia dääi kti
Mlaih mei ni xa-a dääi kti
Ngleen pa i am kyeem laang ääi
Khaai yääi i am kyeem laang ääi



TIMKHAAI PASONG....

Kpuungnu nah yuk hüt hin phi
 Daai tim nah yuk hüt hin phi
 Thei thang nih theia don naak vai
 Hnulam ni ngla-a don naak vai
 Kkhyou sangla-a don naak vai
 Malam ni ngpyanga pyaai naak vai
 Daai sangpyanga pyaai naak vai.

Mleeng yam nah yäai hüt hin phi
 Ngleen pa noh nah yäai hüt hin phi
 Ngbo tuh ngooi ta suum love
 Timkhaai kuma suum love
 (45) -a suum love
 Kkhyou jah Daaia vaai naak vai
 Timkhaai ni kvaaia thoon love
 Kkhaan tu ni säpa ksäai hnüh khü
 Nu Booia mkhüh nüüm ksäai hnüh khü.

Tuh ta nah pan pääng kti
 Kkhaantu nah pan Pääng kti
 Ngleen pa noh nah pan Pääng kti
 Kpuungnu nah tüüi hüt hin phi
 Timkhaai nah tüüi hüt hin phi
 Pung pyeen ni luuma om ei vai
 Phung jah pia thoon lokhü
 Mpang lai tuia thoon lokhü



NU BOOIA KESU

Kho mdek pumsha
Amthan kshuunga
Kyulü ngpä lü
Mlung kko kshe noh
Nah mjü kah mjü
Kkhyaang mjü mkhoi lü
Kho mdek lama
Nah nääng ei khoi

Kah nu booia kesu ni
Khaan tu booia kesu ni
Thi-hlü kkyung hna
Kah ksütin shak phi
Xün shei be yah
Däm duh lo be
Sangsiima kvaai
Vaai saai lolü
Ahmnüüp amthan
Kho yaaia pe hi
Akvaai ksheen noh
Hnün nalo lü
Pangsiim je ei
Mküüi ei hnüh ni.



NAH BÄ SA NI TI TU KONG...

“O ngyeek O ngyeek” ti ngüshe
 Kho kdei kbook ta, kah hmuh lo üng
 Kkun nu kkepa nghngi siim sa
 Kho mdeka thuum ning am kshing ngü
 Kho mdek noh ta nah kshing kti
 Pangsiim noh phi nah hmat kti
 Nah bä sa ni titu kong.

“O ngyeek O ngyeek” kah kyap kti
 Jih khuui k’uma kei hnashen
 Süsa mangna am kshing ngü
 Nghngi siim kkhyang ksaai am hmat ngü
 Akdo akshe am ngte ni
 Nääi long noh ta nah kshing kti
 Paai long noh ta nah hmat kti
 Nah bä sa ni titu kong.

“O ngyeek O ngyeek” kyap ngüshe
 Kkun nu kkepa kei hnashen
 Jih khuui k’uma nghngi siim sa
 Ngphyoh khuui k’uma kei mangna
 Kho mdeka tuumseen kshing lo vei
 Nghngi siima ngnei shak hmat lo vei
 Tui nah mhnuh kti kah Pa ta
 Lam nah mshüüm kti pangsiim ta
 Nah bä sa ni titu kong.



Msuum jah ngmhüüm va nih ni üng
Hnuun püio kpaam pa thü hlet lo
Yang sumo hnuun püi käh hniinga
Mse tu lunga käh hniinga

* Nih nu sän kah ksüün be üng ta
Mpyu kseng sän kah ksüün be üng ta
Nih nu noh nah kthäh tü kkhai ni
Nu msuung noh nah kthäh tü kkhai ni
Hnuun püi noh i kba kah mtheh vai
Nah na noh i kba kah mtheh vai
Mhnüüpat kho ni tikhom kong
Soon ei naak ni tikhom kong
Nih pa sän kah pan be üng ta
Thaai baang sän kah pan be üng ta
Nih pa noh ning ksäk tü kkhai ni
Pa kseng noh ning ksäk tü kkhai ni
Mnaai pa noh i kba kah ti vai
Nah na noh i kba kah ti vai
Mthanat mat yam vai tikhom kong
Ngleen ei naak ni tikhom kong.

* Shi nu thinga ngdüih naak sä
Mpyong mah ksima ngbah naak sä
Sha yang mkha-a ngtaih naak sä
Shohlai lia ngsun naak sä
Ngbuong longa she ksiin mhloon kkhai
Khaaü longa vok lai mseh be kkhai
Mkhuui lam ni lia ngtung be bä
Msiing sa ni lia ngtung be bä
Mka lam ni ksima ngbat be bä
Väai long ni ksima ngbat be bä
Nih nua mkhuui lam hju be bä
Ngbuong longa mkhuui lam hju be bä
Tuh ta dong län län khoma
Kpaam pao, dong län län khoma.



NIH MBOIH-A SHO, KYAH-A LAM KYO

* Tui nih kyum ding nih kyaak üng
Nu kkhyüa long hmüüi nih kthüih lolü
Nghmüüma yüüi kkhyuk nih suuk bät sän
Nah shüüm ham kkhai ni
Lüphi nih küünong nih loonpät nalok kti ni.
Nih tui kyum nih ding kyaak üng
Pa mhnama kkong be nih kkhaih lolü
Kbooka nglaang mhma nih kyaak pat sän
Nah kshing ham kkhai ni
Lüphi Nih ngthangtui pe nalok kti ni.

* Nih khüh khüüm nih lairoom üng
Phung long üng kaai loma lü
Mpüilu nglingsa pu nak kti sän
Ngthang tui hnuun püi nih ni nibä.
Nih khüh khüüm nih lairoom üng
Kshi hmu mphaai dou üng
Nglüüm loma lü
Matu taak sa pu nak kti sän
Hnuun püi kpaam pa nih ni nibä.

* Booi sa kkhyaaanga ah mpya naak
Ngyakyah kkhyaaanga ah thih naak
Nih pa-a kkhui shui mshing ei veeng
Nih mboih-a sho kyo, kpaam pao
Nih kyah-a lam kyo hnuun püio
Nih nua k'ä ham kah ti sän
Nu msunga k'ä ham kah ti sän.
Nih pa-a mhluum ham kah ti kyo
Thaai baanga mhluum ham kah ti kyo
Hnuun püi hin nah i tü kti ni
Yang sum nah i tü kti ni
Shong jah ngkoi noh ti kkhai ni



O, THIH NAAKO

O, thih naako
Nglei kho mdek hin
Nanga noong vei
Ngtuui ngleen naak ni.

O, thih naako
Nglei kho mdek hin
Nanga noong vei
Mlū mlok naak ni.

O, thih naako
Nglei kho mdek hin
Nanga noong vei
Ngloh ngsaam naak ni.

O, thih naako
Nglei kho mdek hin
Nanga noong vei
Pa khyap naak ni.

O, thih naako
Kah puum sha hin
Nang ũng khüt lū
Shüt kyo lūphi
Kah ngmüi mkhya ta
Angshäai khoa
Pangsiima veei sit be kkhai.



KOOI KAIH

Kthei nghu kthei khmin
 Käh kyüa
 Nah kyaak naak mdek
 Kooi kaih ve.

Mpyung üng mpa shen
 Käh pooka
 Nah pook naak mdek
 Kooi kaih ve.


Bong-ma ktheih mthing
 Käh kyüa
 Nah khyü naak mdek
 Kooi kaih ve.

Jeih ei tui k'üüt
 Käh puuta
 Nah puut naak mdek
 Kooi kaih ve

Lou kshe ngnoa
 Käh pyoua
 Nah pyou naak mdek
 Kooi kaih ve.

Mhlou mhlak akpo
 Käh pyoua
 Nah pyou naak mdek
 Kooi kaih ve.

Kkhyäi paai mpyüm kkhai
 Käh pyah-a
 Nah pyah naak mdek
 Kooi kaih ve.




VATHEIH BÄ

* Mjü kphya nalü
Khuut poh lok kkhai
Pasong ktheema
Ve naak vaia
Käh kyoh ti lü
Vatheih-a.

* Ngnam mseh nalü
Kkhyü pyen lok kkhai
Pasong ngvaaia ngdüih naak vaia
Käh kyoh ti lü
Vatheih-a.

* Kkhui küüi mah-a, thang mseh nalü
Tala kkyaang kkhai
Pasong ksinga ngoh naak vaia
Käh kyoh ti lü
Vatheih-a.

* Pu tu lisung, kkoi na mhnaak kkha
Jah mhngi be kkhai
Shohlai ktheia lo naak vaia
Käh kyoh tilü
Vathaih-a



PASONG PÄIH PÄIH I AM NI

Ah lu ksuii kti ah nih ti
 Pasong veni ah nih ti
 Lu ksuii päih päih i am ni
 Pasong päih ta i am ni
 Pasong kkhai ta ngshing lok kti
 Ah tala üng ngshing lok kti.

Mpyu nghngaai hnak kti ah nih ti
 Pasong veni ah nih ti
 Mpyu nghngaai k'hna päih i am ni
 Pasong päih ta i am ni
 Pasong kkhai ta ngte lok kti
 Ah mong hjang üng ngte lok kti

Lu-moom shoom kti ah nih ti
 Pasong ngtou ve ah nih ti
 Lu-moom kshoom päih i am ni
 Pasong päih ta i am ni
 Pasong kkhai sun ngshing lok kti
 Ah poh pyen üng ngshing lok kti.

Mü-lüm ju k'o ah nih ti
 Pasong thei kti ah nih ti
 Ju k'o päih päih i am ni
 Pasong thei kti i am ni
 Pasong vai ta ngte lok kti
 Ah nghmüüm be üng ngte lok kti.

Thaih peeng buh k'ei ah nih ti
 Pasong ngvaai ve ah nih ti
 Buh k'ei päih päih i am ni
 Pasong ngvaai kti i am ni
 Pasong kkhai ta ngshing lok kti
 Ah kkhuai shui üng ngshing lok kti.



KAH MLUNG-NGMÜIO JEKYAIA


Püi nghnge naak noh
Helat khoa, nah tha lüphi
O, kah mlung-ngmüi jekyaia

Sam-sah naak noh
Paang kooi yama, nah kpha lüphi
O, kah mlung-ngmüi jekyaia

Püi mdih mshuui noh
Puk sheet tui nu, joh shak lüphi
O, kah mlung-ngmüi jekyaia

Püi mkeei mshong noh
Mboih kyah mei pa, ngkah shak lüphi
O, kah mlung-ngmüi jekyai-a

Kah mlunglo noh
Thih naak pe da, seh kyo lüphi
O, kah mlung-ngmüi nah kuum ei.



MALAM MTÄÄM LÜ

Mboih kyah üng phi
Kphyütui xut lü
Suum be tü.


Ngnoi ngsai üng phi
Noong vei ngxü lü
Ngdüüi be tü.

Shuum neem üng phi
Mlung mhneem ma lü
Nghui be tü

Ngshuk ngpä üng phi
Thou lobe lü
Joong be tü

Ku ih üng phi
Thü hlet be lü
Mdei be tü

Suumlua pyüng
Ngaih khoa mja üng
Hnulam käh hju
Malam mtääm lü
Sit be tü.



ANGNGAIH HMUH-A
PHALOK KTI

Am nih mbüüp nääng
Kyah jah yaih

Am nih ngthei xa
Mkhye jah ngjäh

Am nih sit xa
Thih jah ngnü



KKHUI KÜÜI MAH-A JOU JUT KTI

Kkhui küüi mah-a nih nglou lü
She mlung kshea nih thoon ta
Songpyang ah jou jut kti ni.

Mje-kkei mah-a nih ngthang lü
Kkhyaang kko kkhyua nih thoon ta
Pasong ah la am veti.

Mpyong mah nih ngtek kyo lüphi
Tala am nih kkyüth thei ta
Mong hjang ngvaaia am nih thoon.

Mkhuui lama mlikli kyo lüphi
Hlün-hlah ktunga nih khyun ta
Sumtu khi noh joon in kkhai.

Mka lam jeipheeng mah lüphi
Samsah ni kpanga nih kdap ta
Shiipu mkyah noh pyaai in kkhai.

Shohlai kut mah nih tilü
Hma lü am nih vangdüih ta
Amkhuuk bu ni tik kkhaie.



SHUUI NU NÜT, MLA YAM BÄK

Mlungli shuh dam kho tuh veia
Keia k'uma nah ve mäia
Nanga k'uma ve theia ta.
Kümseei khüt kkhai, ti ti ngüshe
Mlungmüi khoa ngleeng veeng ngü.

Kah mseh naaka nah ng'yeen naak
Kah kphya naaka hlü ei hlü
Am hmuti lü mü veeng ngü
Kkhyou lunga ng'yüng lü, mü veng ngü.

Shuui nu kah mtheih ei naaka
Ng'yeen kho kah mtheih ei naaka
Mshong-hmüi yuk lü mü veeng ngü.
Mhnüüpat kho phi mü veeng ngü.

Mla yam kah mhnoon ei naaka
Mhnih dam ve kho kah mhnoon ei naaka
Kkaam-lei yäai lü thaai veeng
Mthanat yam phi thaai veeng.



Ah nu va kkhui küüi mah tü vai
 Ma lam ngoh kkhai ti ti lü
 Kunshung ni ngphyoh üng nah k'ä lü
 Mshonga ng'yüing kti kah nääi long.

Mse tu longlung hei lou lü
 Kongma yüipok hei hong kkhai
 Bungming mah vai ti ti lü
 Nah k'ä kshok kti kah nääi long.

Tuh ta mkhuui lama ei kyo khü
 Shongtu hleei hlook ei kyo khü
 Shih nu nanga hmuh vai shü
 Nääi long nanga hmuh vai shü.

Nu im nah ksüün pääng kyo kti
 Mpa mnaai kooikaih ei kti phi
 Mlikli noh ngja-daaü ti ngüshe
 Kah ja juun ve nääi long ääi.



KAH NÄÄI LONG

Angmou ooia nah ooi lü
Khya kko kha xa nah nghnüüi ve
Mo-pi mkot säp mkhaam ei täh
Nah sa nak kti kah nääi long

Amthiip kkha luum, angling la
Käh ei ham bä ti ti lü
Aktui mhlím lü kah ei vai
Nah xü peet kti kah nääi long.

Ngbok nglat ei lü kah yaih üng
Kukku li-maai kyalo ve
Aai-ong aaia nah sa thuh
Nah mhluum kbä kti kah nääi long.

Ah mjung ki-ni nalü ni
Msuum jah nghmüüma akshuunga
Khonglunga mpyudung hei shung lü
Hnün-shing ngoh kti kah nääi long.

Ah mja kepne nalü ni
Ngäih jah ngthanga anglaka
Kdääm nglaka mleeng-kye hei tak lü
Kongma ngam kti kah nääi long.



LISUNG THEYO

Nu sa mat üng ka kyo,
Be-na nih ngkhoi ngkhya lo ta
Pa sa i kba ngi kkhai ni.

Im ye lia nih thoon lü
Kho hne nih ngsuh lo ma ta
Shongkoi i kba ngi kkhai ni.

Lou kkhyaang danga nih lolü
Ng'yübäng nih ngkaih lo ma ta
Pi nu i kba ngi kkhai ni.

Nih lo pu kphyüm hei hoih lü
Akse siim siim nih shui ta
Onglam i kba ngi kkhai ni.

Long kpya nih shalo lüphi
Tui vangkhoih-a nih thoon ta
Shohlai i kba ngi kkhai ni.

Khi hmo nih duum lolü phi
Kkong vangpa-a nih thoon ta
Songpyang i kba ngi kkhai ni.

Daai na päih ni nih tilü
Lisung am nih mkhiing thei ta
The-yo i kba ngpok kkhai ni.



KITANG I MÄI ÄÜH LÜPHI


Kitang kitang ah nih ti
Tum vai te vai ah nih ti
Nih nua tum mäi i am lo
Khing khong tum mäi i am lo

Kitang kitang ah nih ti
Te vai kkhoong vai ah nih ti
Nih pa-a te mäi i am lo
sing sang kthai mäi i am lo

Kitang tum lü ah nih ti
Ng'äi vai ng'om vai ah nih ti
U noh ia, ng'äi lüphi
Hip Hop Rocker ng'äi lüphi
Nih nua ng'äi mäi i am lo
Nghmüüm be ng'äi mäi i am lo

U noh ia tum lüphi
Lä län ni donga tum lüphi
Kitang ia tum lüphi
Nih nua tum beh nghniing kkhai ni
Akphyüm be sän nghniing kkhai ni.

U noh ia, äüh lüphi
Kitang ia äüh lüphi
Angpyan pyaaia äüh lüphi
Nih pa-a te beh ngkäih kkhai
Hlaan ma sän va ngkäih kkhai
Daaia na noh kah ti khü
Mnaai pa noh ta kah ti khü.



Among Lame

27. Sheen pa va kam mah nikyo kba	- 038
28. Ääp Lă Malam	- 039
29. Sūsa jah mangna	- 040
30. Hlū nāānga kaalah hoih hūit bā	- 041
31. Ve dam Kphyū tui	- 042
32. Nghnu Mi Ti ta	- 043
33. Mhlā naaka msi, kphya naaka khuut	- 044
34. Kphya naak mjū nghngih	- 045
35. Amsi jah aktheih	- 046
36. Nāāi longa nana bā vai ni	- 047
37. Shong tim hmü mpa khaai hme	- 048
38. She Mlung tuisi, kkhyang kko hnah je	- 049
39. Nu Hmeei Yang long	- 050
40. Kpuung nu tui jah mkheeng shanghmo	- 051
- Kkaam Lei	- 052

Copyright©2018 by David Phway (USA). All rights reserved.
No portion of this book may be reproduced in any form
without the written permission of the copyright owner, except
for the brief excerpts quoted in critical reviews.

Shäängvan©2018 by David Phääi (USA). Ah nih noh shääng
van nak kti ni. Shäängvan mah-a mkhyah mtaang naak käh
ngpüi xa ktia ah hina sa up-a k'uma vek ktia sa nglung nische,
sa yüüi nische hneet ei, pyiitpyaan, shum mang lü am ng'yah.
Shum mang shunkhi hlük kti noh ta shääng van mah üng
kthäh ma yah kkhai.

Among Lame

■ 1. Kitang i mǎi äüh lüphi	- 007
■ 2. Lisung theyo	- 008
■ 3. Kah Nǎäi Long	- 009
■ 4. Shuui nu nüt, Mla yam bāk	- 011
■ 5. Kkhui kütüi mah-a jou jut kti	- 012
■ 6. Angngaih hmuh-a phalok kti	- 013
■ 7. Malam mtääm lü	- 014
■ 8. Kah mlung-ngmüio jekyaia	- 015
■ 9. Pasong päih päih i am ni	- 016
■ 10. Vatheih bǎ	- 017
■ 11. Kooi kaih	- 018
■ 12. Thih Naako	- 019
■ 13. Nih Mboih-a Sho, Kyah-a Lam Kyo	- 020
■ 14. Nah Bǎ Sa Ni Ti Tu Kong...	- 022
■ 15. Nu booia kesu	- 023
■ 16. Timkhaai pasong....	- 024
■ 17. Kah sa na nah kthäh to ta...	- 026
■ 18. Ksüün shak malam..	- 027
■ 19. Nglooi püi ti ta....	- 028
■ 20. Paai Longa pha lo be vei	- 029
■ 21. Asäna Mǎi Nah Hmukhoio	- 031
■ 22. Tuh ngooi kona kho ngooi	- 032
■ 23. Kah ih ngmang va nikhüng vai	- 034
■ 24. Kei tia mlung hoa ni	- 035
■ 25. Ng'yenga ng'yün kkha-a Ngkou	- 036
■ 26. Paai Long Tita	- 037



SHUPBEIH KTIA KKHYÜ SÜK

Ahin kba sa up akthaai mat asom lo be tüa phäh Pangsiim je ei. Yuk yäai tüüi dok kti Yang Long phi aksanga je naak ni. Ahina sa up hin timkhaai(45) kum-suum shüüm naaka phi thoon kti.

Tuh veia nih Daai tim hin nih shum mang yuk yäai lokyo ktie. Mshong hmüi(kapja) tia ahnga-a yuk am veham. Ng'äi ng'om, kkhui shui, kkhui kkaam ni ave ham. Kah tu, Yang Long hin kah paai longa hnuun pui, si si ngleen khenga tua thoon lü, ah mah püia thei theema msi, sotpyou be ktia ngngaai lü jekyai, üm ei ni. Ah mlunga mlü, xe nak ktia thoon lü pangsiim noh nih Daai timkhaaia phäh mhläi lü shum mang kkhai tia kah jum kti.

Pasong Ngling Sho

Daai timkhaai

Jankung



TIM YUK KTIA KKHYÜ SÜK

Ahin kba am ngngaih khoh hmuh-a “mshong hmüi jah kkaam lei” tia sa up poh pyaan lo khoh hin Pangsiima bä, sheen paai ni. Aksanga kah je-kyai xexok naak sun am nüt yaan khoh ngü. Ahina sa up üng ta “mshong hmüi “ (40) jah “kkaam lei” (60) jah mdon lü poh pyaan ni. Mshong hmüi ti hin ta ampa läka “kapja” ni. Kkaam lei ti ta ampyong kshaama kkhui shui ni. Tala mong hjang üng nupüi pasong noh anih nghngih-a jah shum mang ktie.

Sa upa thoon lo vai, ashät shäta nah kpüi kpak ktie phi jah je ei ni. Kah päta theileh, ngjung ktha üng ta am nääng ei ngü. Yuk yäai, shupbeih lü nah khüüi napüi kti mah kho pasong Nging sho ni, xün üng nah ngdüih peet kti mah kho Phäai Mnaai ni, sa up hneet poh pyaan üng mtun ei kti pasong Mnaai Ngling Pääng phi jah je ei ni.

Timkhaai pä noh nih läk üng tim sa up 150 bang ta ah nih poh pyaan kyo u. Sa ngthei lok ktiea shum mang, täh kkheh ei vai am venu ktia mäi ni. Daai sa ngthei kti kyong saea phäh phi phumah kkhaia kah ngngaih. Ahina saup (timbüüp) hin khüh kheh, kümseei kkhai ta am nikyo. Kah lo kpha ei säpa kah poh pyaana thoon lü abänga phäh kensu kkhaia kah äap kti. Mya lü kah ve k’um üng ta mhlai lü kah mtun ei vaai ham kkhai tia kkhyü-shing taang lü

Yang Long
Yang Imnu
Ksheng Msuung Mdek

ပုံနှိပ်မှတ်တမ်း

စာအုပ်အမည်
စာရေးသူ
မူပိုင်
မျက်နှာဖုံးဒီဇိုင်း
အတွင်းသရုပ်ဖော်
စာမျက်နှာဖွဲ့စည်းမှု
ထုတ်ဝေခြင်း

ထုတ်ဝေသူ

ပုံနှိပ်သူ -

ပြန်ချိရေး
အုပ်ရေ
တန်ဖိုး
စာမျက်နှာ
စာအုပ်အရွယ်အစား

- SÜSA JAH MANGNA
- Yang Long
- အေးဗစ်ပွေး(USA)
- ညီထွေးကလေး
- ညီထွေးကလေး
- သိုးသူငယ်
- ပထမအကြိမ်
- ၂၀၁၈ နိုဝင်ဘာလ
- ဦးမန်းလိန်း(ဟောဂျူဏ္ဍာစာပေ)
- မှတ်ပုံတင်အမှတ်(၀၁၃၆၀)
- အမှတ်(၂၄၈)၊ နီလာလမ်း
- ၂/၁ တိုးချဲ့ရုပ်ကွက်
- ထောက်ကြံ့။
- မျိုးသန်းပုံနှိပ်တိုက်
- မှတ်ပုံတင်အမှတ်(၀၀၇၁၀)
- ဟောဂျူဏ္ဍာစာပေ
- ၁၀၀၀
- ၁၀၀၀ ကျပ်
- ၅၄
- ၁၃.၅ x ၂၁ စင်တီမီတာ



HL
HOSANNA LITERATURE CENTRE
မုဝ်ဇ် - ဓေးဗ်ဗွေ(USA)

SUSA JAH MANGNA



YANG LONG

- Mlū mlok üng jekyai, mhlīm ei üng xe naak.
- Kdo pooi üng ng'äi kti shing-shü, kshe pooi üng kyap kti shü-net.
- Hlut mah noh hlut shuui thei kti, ngtheet mah noh ngtheet hnam thei kti.
- Ah nih khüüi um üng nah ih ta, ah nih ih üng nah khüüi be yah kkhai.
- Yaih miktui jah kyah kphyütui ta am täng ni.
- Songpyang ngjuung üng pi-im nih shui hin, nih mse-sa-a mläh-li naak ni.
- Ngla-mi ktha üng ngnam lou nih shak hin, nih kkhaan na-a boong kaai naak ni.
- Ngbüing-pi im shui kti noh, ah mlung tuisia buui kti, ngtei-lou ksha shak kti noh, ah ngnei hnah-jea phah kti.
- Ngjung ktha kthei jah pum-nyam ktheia kthaka, mlung-müi kthei ktha-mah bok kti.
- Ngjung ktha-a koong ta ngyam noh, ngyama koong ta mlung-ngmüi noh nääng kti.
- Mlung ngmüi kdo jah mdek ngnei kshe am ngkhot ni.
- Ngjaak vivaih mjoh kti, hmuh shi khyā mjoh kti.
- Anghmoonga khüüi jah akdama ei deen kti.
- Nih shum hmi-hme mjoh kti, nih kyam vovat mjoh kti.
- Ngkeei ngku ta akuung, kbaü ei hin apam mjoh ni.
- Pu ei lei ngseek kti, am je ei thei lei nung kti.
- Am khih khoh phi je ei naak üng, yü bāk vai.
- Keia phäh nang, nanga phäh ah nih, hlü kkhai.
- Ngsih ngkhäh ktia soon ta-ngi, ngseei ngshaang ktia vatluum-le.
- Kho üng kho ning-lam vek kti, kkhyang üng kkhyang sho-lam vek kti.
- Yo-mdoh khuui üng mti, kkhyang mdah mpyong üng lei.
- She hälä noh yüüi ooi kti, kkhyang hala noh kkhyo shoong kti.
- Sülü-kphyüi ta kduknu mkyün üng ah nih mkyün, mang -ye kseei ta kdaaüpa mhmaan üng ah nih mhmaan.

SÜSA JAH MANGNA

- Nghnu ngla be ta nih sha-hlū, akphyüm be ta nüüm yū lung.
- Pu ei kti ta mpya, jah kpu kti ta booi.
- Kphyooia mpyuk sho jah pä ktuui, kshika saang-ah jah vah vook.
- Ngshut lū mtät kti noh huui-sik, ngdüüi lū khüüi kti noh aai ngla.
- Kphya nak kti noh peet vai shui, kpaam ei kti noh yah vai hjam.
- Ääp ei kti noh aphu-kheen, ku ei kti noh kesu-mang.
- Mthi nääng ei kti tui, tui nääng ei kti khokhi.
- Ksüün noh seh lū msüm-hnün, tui noh seh lū mpang-lai.
- She mlung kshe ta ah mting le kti, kkhyang kko kkhyu ta ah ngkyang shen kti.
- Li üng ala ah nih büh, the üng apyat ah nih teng.
- Ah mik mkhi-hmi kti noh mukat, ah nghnga kpe- nge kti noh baan säp.
- Nih vapu ta lei kdo, am nih peet thei lei kshe.
- Nghngih-a poh phi am pyuun, kthuma pyen phi am tääm.
- Ksong da sungkeek, kkheet da kkhaai kpeh phi am do.
- Booia ktha ta xün, ngya-kyah-a khoh ta ktha.
- Mpyu paai pyah lū ah nih yuk, yodaai tooi lū ah nih ei.
- Nih kaih phyot noh jah kkhyak kti, nih hei däh noh jah mkaai kti.
- Nu-hmeei ei vai longlung loh, ngya-kyah ook vai yüüi-pok hon.
- Booi noh ngya-kyah ah kyüh, ngya-kyah noh booi sa ah hnep.
- Nih buih ju k'o noh phi jah kkhi kti, nih khüün buh k'ei noh phi jah kkhaih kti.

KKAAM LEI

- Ui noh ah hmuh yäüh kti, kkhyang noh ah ngjaak pyen kti.
- Buh napat üng nih ei hmü, lam mkhaamat üng nih seh hma.
- She te ktia lu sing, kkhyang that ktia nghnga shah.
- She-mse noh ah ktha, pasong noh ah hmüüi.
- Ngbüing-pi im shui naak, songpyang ngjunng am nih täh ei, ngtei-lou ksha shak naak ngla-mi ktha am nih kkhe ei.
- Ah mlung tuisia buui kti noh nupüia müi sheen shak kti, ah kko hnah jea phah kti noh pasonga hmaai pai shak kti.
- Imkhu am nah nääng ei ta, nngam khong kdäma am thoon kti.
- Nih khüüi khoom naak nih khuut sän, nih ei k'ama thoon kti ni.
- Aai nu voka thoon lok kti, vok nu shea thoon lok kti.
- Ju bängat noh shuui phu nalü, buh mka-at noh phi moong tham nak kti.
- Nääia kkhon nu kah ngtüüi naak, paaia mlung mthin kah ngdoon naak.
- Nih nua sih tui noh mpüi phu nak kti, nih pa-a mphutui noh ngshe tham nak kti.
- Nua thi-shena phu, pa-a mphu-tuia kheen
- Nih nua mlik yüng mkhuuk ta nih ngdüih naak, nih pa-a mo-pi mkap ta nih thoh naak.
- Amti hlü lü, ayuh shui, kthuui k'ei hlüa, khang-kha hjap.
- Kkhyäi paaia ngtoutui ook, khe hnah-a sheen mei ei.
- Am ei phun kti noh ah kyuk naak, am otääm kti noh ah ngpä naak.

KPUUNG NU TUI JAH
MKHEENG SHANGHMO

Tui am hmuh vai, tui long khü
Nu tui ngki lü, long kti ni
Kpuungnu noh, lung liin leen lüva
Yang sum, lung liin leen lüva
Tui khyük be kkhai, tui long khü
Tui noong vei phi, tui long khü

Kpung jah mleenga asum sä
Yangsum lia thoon lü
Li nga ni kkhyata ngleen naak ni
Noong vei khoa, ngleen naak ni

Kkha am ngjaak vai, kkha ngkou khü
Mkheeng shanghmo phi, kkha ngkou khü
Kpuungnu, thing liin leen lüva
Kah nu, thing liin leen lüva
Mkheeng üng k'ngam phi, kkha ngkou khü
Kha noong vei phi, kkha ngkou khü
Kkha khyük be kkhai, kkha ngkou khü.



NU HMEEI YANG LONG

Keia phäh ta, kah ih naak vai
 Khataang ak'hlüng, am hlü ei ngü
 Ngphyoh yüi man lü, nah k'ä kshok kti
 Nääi longa hmaai ni, kah hmuh hlü

Keia phäh ta, kah ve naak vai
 Ut im pen im, am hlü ei ngü
 Ma da äp lü, buh nah hmom kti
 Paai longa dä ni, kah ve hlü

Keia phäh ta, kah ei ook vai
 Akyou ahlaaü, am hlü ei ngü
 Amkääi sa üng, thuui tak mshoon lü
 Kah ei khoi ni, kah mhlím ei.

Keia phäh ta, kah shuishak vai
 Ngkuk phyang pongpi, am hlü ei ngü
 Nua shui khoi, soon ta ngi jah
 Vatluum le ni, kah ngvaih hlü

Nu am hmuh ti, kah pät kuung hin
 Nua thoon lü, nu hmeei üng mü tui
 Tu veengü

Pa am ngaak ti, kah pät kuung hin
 Pa-a thoon lü, sa ooi üng ngooi ksaak
 Mbei veengü.



SHE MLUNG TUISI,
KKHYAANG KKO HNAH JE

Mkhuui lam mlikli, nih li lüphi
Mkhuuia ngtung kti, nu hmeeia mpüi puk
Büh yah vai


Mka lam jei-pheeng, nih mah lüphi
Mka-a ngjiin kti, ngya kyah-a ngshe kkhon
Ngngaih yah vai

Am suum khoh kti, she msuum kti ta
Tui üng mdih heen, mlanga long lung
Be kkhai ni

Am sang khoh kti, kkhyaang msang kti ta
Kkong üng kpoongsi, kkhaana aaishi
Be mjoh kti.

Hlün-hlah ni hlün ktung, käh khyun xa lü
She mlung tuisia, buui ua
Pantaai ni ngsak kpang, käh kdap xa lü.
Kkhyaang kko hnah jea phah ua.

Nah hmüüi mtuui-lu, nah mhlün hlü ta
Ei hlük kti üng, nah saang buh k'hlim
Khüün ma kti lü, mbei ma tua
Nah mpyong kkoom ha, nah mtaai hlü ta
Ohlük kti üng, nah pum ju ktui
Shoong ma kti lü, tu tua.



SHONG TIM HMÜ MPA KHAAI HME

Kah lo pu lam, kah büh üng
Lo naak san noh, shakyo kti
Nih nua shing-nghngi sha-kyo kti
Nghngi pei süüp mah sha-kyo kti.
Shongnu va, sheen book ktia mǎi
Shui mkim, sheen bok ktia mǎi
Mnaai pa, mü lotü kkhe mǎ
Kah mik mü lotü kkhe mǎ
Mah kho ääi, käh nah kbäü ei bä

Kah thang pikho, kah ngngaih üng
Kah kse khoi noh, jih kyo kti,
Phyangnu jemah, jih kyo kti
Mpa mnaai, pai bok ktia mǎi
Shak mhnou pai bok ktia mǎi
Mnaai pa noh hme lotü kkhe mǎ
Shak vai, hme lotü kkhe mǎ
Mah pai ääi, käh nah kbäü ei bä.

Shonga, shong-khu hmü ngüshe
Shong-tim hei hlup hmü ngüshe
Nih nu, am kah lo ti hin
Näai long ääi, käh nah kbäü ei bä.

Mpa-a, mpa mnaai hme ngüshe
Mpa khaai, hei yäai hme ngüshe
Nih pa, am kah kpha ti paang
Xäi hne am kah kpha ti paang
Paai long ääi käh nah kbäü ei bä



NÄÄI LONGA NANA BÄ VAI NI

Songpyang püi noh, tilü phi
Shonga ngdü-yüng, tilü phi
Ngdü-yüng sheen ve, tilü phi
Kah msuung ni, kah pan ei be kom
Mpyu kseng ni, kah pan ei be kom.

Mah khoa sa ni, ti ngüshe
Shuui kho nüt lü, kah ksüün ei
Tuh ta, pum lotü hnüh ve
Mpyu ksenga mpyu ng'uui, pum lotü hnüh ve

Kah tui-kyum mpyu, ti ngüshe
Mpyu ng'uuia, pum naak ti ngüshe
Näai msuung, kah büh be be ni
Mpyu kseng kah büh be be ni.

Näai longa na ta, ti ngüshe
Mla yam bäk lü, kah ngngaih ei
Tuh ta, pyah lohnüh ksang ve
Thaai baanga ngmeen paai pyah lohnüh ksang ve.

Kah kampa-hne, ti ngüshe
Ngmeen paaia pyah naak, ti ngüshe
Thaai baang phi, kah ngngaih be be ni
Kah kseng, kah ngngaih be be ni.



AMSI JAH AKTHEIH

Nah hlü ei sän, ääp ei kti lü
Mhlä naak akka, kphya naaka khuut
Nah bi hü ta, nanga mkhye ni.

Mhlä naak msi jah, kphya naak khuut sän
Ayüm mata, jah mtoih üng va
Mhlä kphya naak hin, kümseei kti.

Mhlä naak msi hin, kphya naak ktheih-a
Athoon vaia, poh jah pyen phi
Mlung-ngmüia kkhyüh, ngtüüi yah kkhai.

Nih hlü ei lü, nih loh ei ta
Loh ei msia, ngthei lok kti
Nih do shak lü, nih dou ei ta
Sheen paai msia, ngthei be kti.

Yah vai ääp lü, nih hei poh phi
Mhlä kphya naak khuut, am nilü ta
Mlunglo ngnei-shak, vaküm seei lü
Mkhye naak hama, thoon lok kti.



KPHYA NAAK MJÜ NGHNGIH

Ve soh ngki ngheei, ah lupleei dāk
Bük shoxat lü, nih hlü ei phi
Noong vei kho üng, päih be kti.

Pum ngyam thei-leh, ah poh pyen dāk
Ngngaai shoxat lü, nih kphya naak phi
Kho vei am khyaih, khyük be kti.

Khoh kkhyam booi beei, shuui she moong yang
Hei sat nalü, nih püi naak phi
Am ngngaih hmuh-a, nghaai be kti.

Kkhyanga am hmuh, mlung-müia ngtüüi
Nih ngjaak eia, jah kthü lok kti
Mhlä khpya naak ta, aksang ni.

Aksang jah ahan, jah mkhoih mte lü
Ale abook, xü thei vaia
Mlung-ngmüi mik üng, büh ten vai.



MHLÄ NAAKA MSI, KPHYA NAAKA KHUUT

Mhlä naak msi sän, hnün pyaan kona
Kkhyü-shing be-khät, shuui ngvoong k'uma
Nih sho nglin ta, ngthei paai lolü
Ei yah vai

Mhlä naaka msi, do kyo lüphi
Kphya naaka khuut, apaüh üng ta
Mphyo noh ei lü, am ngthei paai

Nih sho nglin lo, hluui paai thei lü
Do kyo lüphi, ngmu kki k'ei k'o
Am nih xun phi, alap ni.

Pä-ktuui, vah vook, lou phyoh im ksheh
Hei mseei kyet lü, nih khüüi üng phi
Sho nglin ei msi, am ado ta
Anghmoong khüüi khoom, alap ni.



NGHNU MI TI TA

Nghnu mi ti ta...
Nih mseh naak üng, jah mpyeen ei lü
Nih mhlä naak üng, jah kphya nakhü.

Nghnu mi ti ta...
Käh ngthu nghlai lü, ak'hman sa-a
Ve ei püi vai, hlü ei khü


Nghnu mi ti ta...
Nih yah naküt, msun mshep lolü
Peet naak vai phi, mseei be khü.

Nghnu mi sa ta...
Ah kphya naak noh, ah ma üng ta
Mpüi-puk ngshe kkhon, thüi mjoh kti.

Nghnu mi sa ta...
Ah kphya naak üng, ah ve ei ta
Ahna-phai shun, she kuung ni.

Nghnu mi ti ta...
Nih mhnaak yuh üng, mhnün mseng ma lü
Kpa-mi üng ng'yüm kkhai, jah pekhü.

Nghnu-mi ti ta
Am ah do üng, ngpan hü hü lü
Soksek beleh, msom mjoh kti.



VE DAM KPHYÜ TUI

Helat khoa, ve ngüshe phi
Suum kphyü mik üng, kah hei tou kyo
Mpyu kseng kah msuung, thuuk ei khü

Mboih kyah yama, ngleeng ngüshe phi
Hnap haang bak lü, kah hei ngngaih kyo
Thaai baang kah kseng, hla ei ve.

Kho pyook shuun üng, am ip khoh lü
Kah mboih mik tui, phung sum li khü
Yam aai khoon üng, am om khoh lü
Kah mboih tui noh, msaai mei kdäai ta
Mhleih khüng vai

Sho lam am täng, kkhyang mjü küm lü
Khüüi khoom naaka, kke-pheh khaam ei
Booi kyüh ei phi, mlik-yüng mo-pi
Säp säp ni.



HLÜ NÄÄNGA KAALAH HOIH HÜT BÄ

Kkhyou sa-nghnua, ah sa kyo va
Nih soonta- ngi, hei hnu shung lü
Shonga shui mkim, mlü nak kti noh
Shui mkim mthoon lü, shalo ve

Daai na päih-a, ah na kyo va
Nih vatluum-le, hei ma daam lü
Mpa-a shak mhnou, xe nak kti noh
Shak-mhnou mthaa lü, shalo ve.


Nih nua mkhä thing, anääng kuunga
Kkot ma kti lü, shong nua ngnü yüng
Khä vaai vek kti.

Nih pa-a kkyaang yo, akyan kuunga
Kaih ma kti lü, mpa mnaaia kongma
Kdäi vai vek kti.

Nih nua kkoh hüt, mhleih päih lung ta
Hok kba jäk lü, nah kkoh vai ni
Nih pa-a shak hüt, jeei im kdäm ta
I kba mtheih lü, nah seh vai ni

Nih nu msuong noh, ning khü be ve
Tuh hi ngpong lü, nglat lobe
Nih pa kseng noh, ning ksüün tong ve
Tuh hi ngseei lü, pan lobe.

Nu kkhyü üng ngtüüi naak, mhlä kphya naak hin
Noong vei khoa, käh tahüt lü,
Angshääi xüi-im, nih pha pui vai
Mdek jah kkhaan-kho, nghngi khyä aai shi
Khyük päih lüphi, mhlä kpha naak ta
Angshääia phäh, velä kkhai.



SÜSA JAH MANGNA

Hlū-ei hlū jah, mseh-sa na-a
Mhlä kphya naak ta, kho tuh veia
Nghngi thing nghniima, ngdüüi ei lä lü
Aju ksi-ta, shuun ei ni
Kkhyou pung kkoa, shuun ei ni.

Süh-hniim mkhya-dam, jongje xooia
Mhlä-hlik hne ta, ngbo tuh veia
Khya-yo nghjaama, ngdaam ei ham lü
Ahan ksoona, ah jiin ei ni
Daai-long xa-a ah jiin ei ni.

Ju jah mshünga angkhyum naak ta
Mpyungtui uuma, tuh vei ngdou kti
Ngshuh dam xooia, ngi naak be ni

Kkhyäi jah kyonga, angphyong naak ta
Shi-looi booka, tuh vei ngshan kti
Ngphyam-dam xooia, ngphyong naak be ni.

Nghngi üng nih mjung, nih jah mdou lü
Kho nghngia ngjung, nih ngjung nak kkhai
Khya üng nih mja nih jah mdan lü
Mah khya-a ktha, nih ktha nak kkhai
Mhnüüpa ngshü lü, mthana vaai kkhai
Akho-lä phäh, nih ni xooi.

Nu kkhyü üng ngtüüi naak, mhlä kphya naak hin
Noong vei khoa, käh tahüt lü
Angshäai xüi-im, nih pha pui vai
Mdek jah kkhaan-kho, nghngi khya aai shi
Angshäaia phäh, velä kkhai.




ÄÄP LÄ MALAM

Lidüing ngsäp püi, theyo ngteh po
Ngpong lo ua, malam mah noh
Nih pe mhjaü vai, vek kti ni.

Im yeli jah, lou kkyaang dang noh
Nua mkhä-thing, pa-a kkyaang-yo
Tui-khyong ngi lü, jah mdoih u.

Songpyang ngjuung üng, ngdüyüing mkhuui lam
Don naak vaia, nih khän vai u
Nglä-mi ktha üng, kongma mka lam
Pyaaï naak vaia, nih kdäi vai u.

Kkhaantu Booia, kkhyü akvaai noh
Nu im kkit säp, jah kshü hnüh khü
Mlung-müi mik üng, бүк ua
Thoong-khyah mhnama, be shakshi noh
Pa lou mka säp, jah ksäai hnüh ve
Lu nghnga mthe lü, ngngaai ua.



SHEEN PA VA KAM MAH NIKYO KBA

Nih shih buuili, nah nääi mpyu kseng
 Ah suum kphyütui, loongli kkhaia
 Ang'ngaih kka-a, seh tak kti lü
 Kah ti hlü kyo.

Hlün-hlah pantaai, samsah naak khoi
 Khomdek nu hin, käh hmuxa lü
 Seh tak kti lü, nang va phun mah
 Nikyo kba

Nah mkhum khyou-lung, nah paai long phi
 Ngngaih kho hla lü, suum-mei khuuia
 Hnap-haang bak täh, nah tha kti ni
 Kah ti hlü kyo.

Khui-kha ngnü-ngsheng, thüi-shei paksheet
 Booisa ngyakyah, käh ngjasa lü
 Lääät vaai kti lü, nang va kam mah
 Nikyo kba.

Kah sa nang ta, tuuia mhliin yüüi
 Hei ooi kti lü, mkhuuia nglük ju
 Am ok kti

Sheen pa nang ta, yaaia mlaang khaaü
 Hei hnak kti lü, mka-a ngtek buh
 Am ei kti.

Nih nu kkhyü im
 Pa lou pan lü
 Xüi im kthaaia
 Ngleeng ei kti lü
 Yangsum nang va
 Akhäai mah ksang
 Nikyo kba



PAAI LONG TITA

Imkhu nghnu mi
Malam sa na
Jah tu msah lü
Käh mpyeen sheet vai
Khuikha khaam lü
Khüüi khoom lok kti
Nih paai long

Palä täh ei
Lei ngkoi abäng
Shongla naküt
Tumpyen thei vai
Hnulam hju lü
Malam mtääm kti
Nih paai long

Sä yang, kkhum phak
Süh kphi poh ning
Jah mhnuh mtheh lü
Imshui loushak
Long kkong nääng ong
Jah mthei mkhoong kti
Nih paai long.

Imkhu loumong
Khovook salaak
Pusho ngkoilam
Käh khye kkhaia
Aning seh lü
Jah mkhäap mkhuui kti
Nih paai long.



NG'YENGA NG'YÜN
KKHA-A NGKOU

Tuia hiing hiing
Naak säp onga
Pekse pan lü
Sit kti lüphi
Ng'yenga ng'yüng lü
Nah näai long noh
Ning khü be kti.

Kkonga heei heei
Naak säp onga
Khyong kse ngkan lü
Khyük kti lüphi
Kkha-a ngkou lü
Nah paai long noh
Ning khü be kti.

Abooka kho
Lea yama
Kulu vääk tääk
Käh khuikha lü
Nih ngdü yüng kho
Pan be vai.

